

全唐诗卷六百三十五

卷 635_1

【送边上从事】周繇

戎装佩镆铓，走马逐轻车。
衰草城边路，残阳垄上笳。
黄河穿汉界，青冢出胡沙。
提笔男儿事，功名立可夸。

卷 635_2

【送洛阳崔员外】周繇

塞诏除嵩洛，观图见废兴。
城迁周古鼎，地列汉诸陵。
日送归朝客，时招住岳僧。
郡斋台阁满，公退即吟登。

卷 635_3

【送人尉黔中】周繇

盘山行几驿，水路复通巴。
峡涨三川雪，园开四季花。
公庭飞白鸟，官俸请丹砂。
尉黔中后，高吟采物华。

卷 635_4

【送宇文虞】周繇

此别欲何往，未言归故林。
行车新岁近，落日乱山深。
野店寒无客，风巢动有禽。
潜知经目事，大半是愁吟。

卷 635_5

【题东林寺虎掇泉】周繇

胜致通幽感，灵泉有虎掇。
爪抬山脉断，掌托石心拗。
竹蔼疑相近，松阴盖亦交。
转令栖遁者，真境逾难抛。

卷 635_6

【登甘露寺】周繇

盘江上几层，峭壁半垂藤。
殿锁南朝像，龕禅外国僧。
海涛搥砌槛，山雨洒窗灯。
日暮疏钟起，声声彻广陵。



卷 635_7

【甘露寺东轩】周繇

每日怜晴眺，闲吟只自娱。
山从平地有，水到远天无。
老树多封楚，轻烟暗染吴。
虽居此廊下，入户亦踟蹰。

卷 635_8

【甘露寺北轩】周繇

晓色宜闲望，山风远益清。
白云连晋阁，碧树尽芜城。
少静沙痕出，烟消野火平。
最堪佳此境，为我长诗情。

卷 635_9

【咏萤】周繇

熠熠与娟娟，池塘竹树边。
乱飞同曳火，成聚却无烟。
微雨洒不灭，轻风吹欲燃。
旧曾书案上，频把作囊悬。

卷 635_10

【望海】周繇

苍茫空泛日，四顾绝人烟。
半浸中华岸，旁通异域船。
岛间应有国，波外恐无天。
欲作乘槎客，翻愁去隔年。



卷 635_11

【送杨环校书归广南】周繇

天南行李半波涛，滩树枝枝拂戏猱。
初著蓝衫从远峤，乍辞云署泊轻艘。
山村象踏桃榔叶，海外人收翡翠毛。
名宦两成归旧隐，遍寻亲友兴何饶。

卷 635_12

【经故宅有感】周繇

身没南荒雨露賒，朱门空锁旧繁华。
池塘凿就方通水，桃杏栽成未见花。
异代图书藏几篋，倾城罗绮散谁家。
昔年埏埴生灵地，今日生人为叹嗟。

卷 635_13

【送入蕃使】周繇

猎猎旗幡过大荒，敕书犹带御烟香。
滹沱河冻军回探，逻迓孤城雁著行。
远塞风狂移帐幕，平沙日晚卧牛羊。
早终册礼朝天阙，莫遣虬髯染塞霜。

卷 635_14

【白石潭秋霁作】周繇

潭心烟雾破斜晖，殷殷雷声隔翠微。
崖蹙盘涡翻蜃窟，滩吹白石上渔矶。
陵风舴艋讴哑去，出水鸬鹚薄泊飞。
秋霁更谁同此望，远钟时见一僧归。

卷 635_15

【题金陵栖霞寺赠月公】周繇

明家不要买山钱，施作清池种白莲。
松桧老依云外地，楼台深锁洞中天。
风经绝顶回疏雨，石倚危屏挂落泉。
欲结茅庵伴师住，肯饶多少薜萝烟。

卷 635_16

【嘲段成式（一作广阳公宴）】周繇

蹙鞠且徒为，宁如目送时。
报仇惭选爽，存想恨逶迟。
促坐疑辟咤，衔杯强朵颐。
恣情窥窈窕，曾恃好风姿。
色授应难夺，神交愿莫辞。
请君看曲谱，不负少年期。



卷 635_17

【送江州薛尚书】周繇

匡庐千万峰，影匝郡城中。
忽佩虎符去，遥疑鸟道通。
烟霞时满郭，波浪暮连空。
树翳楼台月，帆飞鼓角风。
郡斋多岳客，乡户半渔翁。
王事行春外，题诗寄远公。

卷 635_18

【津头望白水】周繇

晴江暗涨岸吹沙，山畔船冲树杪斜。
城郭半淹桥市闹，鹭鸶缭绕入人家。

卷 635_19

【公子行】周繇

青山薄薄漏春风，日暮鸣鞭柳影中。
回望玉楼人不见，酒旗深处勒花骢。

卷 635_20

【看牡丹赠段成式（柯古前看吝酒）】周繇

金蕊霞英叠彩香，初疑少女出兰房。
逡巡又是一年别，寄语集仙呼索郎。

卷 635_21

【以人参遗段成式】周繇

人形上品传方志，我得真英自紫团。
惭非叔子空持药，更请伯言审细看。

卷 635_22

【和段成式】周繇

回簪转黛喜猜防，粉署裁诗助酒狂。
若遇仙丹偕羽化，但随萧史亦何伤。
玉树琼筵映彩霞，澄虚楼阁似仙家。
只缘存想归兰室，不向春风看夜花。

